

# CANTIC

## MISSIONN PAROS PLUZUNET

**Er bla 1863.**

*Var don Canaoüen Cloarec Paimpol.*

*Benedictus Dominus Deus Israël, quia visitavit et fecit redemptionem plebis suæ. — Cant. Zach. — Saint Luc, ch. I.*

Meulet ra vo bepred tri ferson an Drindet,  
Ar Sent hac an Elez, ar Vere'hes viniguet,  
Da veza deurveet donet da visita  
Popl paros Pluzunet en deïou santel-ma!

Carante hon C'hrouer 'vidomp so meurbed bras,  
Rac lésel 'ra he Vap da vervel var ar groas,  
Vit prena hon ine dre ar briz deus he voad,  
Gant ar c'hoant a neveys da dont d'hon sovetaat.

Ny, bugale Adam, leun a sempladurez,  
O pec'hi a abus demeus he vadelez;  
'Lec'h dont da rei deza plaç quenta hon c'halon,  
Pa memp bet diganta pep tra en donéson.

Daoust d'hon ingrateri a clasq hon pardouni.  
Mar memp bet ar goal-eur, siouaz! d'hen offansi!  
Offr a ra demp bemde cals deus a rémejou  
So capabl da vuellaat an donna gouliou.

Ous eur voüez quen tener na vezomp mui bouzar,  
Distroomp a fe vad var zu Mene Calvar :  
Pellaomp deus an droug ha heuliomp al lesenn  
Disquet gant hon Salver er bed d'ar G'hristenien.

He Vinistred, hirye, evit hon avantaich,  
A guelenn ac'hanomp dre ar memes langaich.  
Vel ar buguel prodiq, dent, emeze, d'ho bro;  
Rac ar guir blijadur a so hebquen eno.

Evel gant Jeremi Jerusalem galvet,  
Demeus eur c'houzq marvel difuni so dleet!  
A dra sur, mar sentomp, eun diluch a c'hraçon  
Da netaat hon ine varnomp a disquenno.

Pa ve bet ar pec'her pell en laçou Satan,  
O terri he chadenn a neve eur goal boan:  
Gant dic'houde a tostaa ous ar govezion  
Nemed en eur retred pe en eur missionn.

Maes chetu an amser a eur-vad, a druez;  
Redomp, evel ar c'harv, d'ar feunteun a vuez:  
E pad pemzec de grenn a vo digor an or  
Deus ar Visericord; preciusa tensor!

Ia! daou artisan caër demeure an Aviel,  
Pere a so ganet ebars an Breiz-Isel,  
A deu da labourat gant acqued en hon toüez:  
Guelet vo ho c'houraich prestic o douguen frouëz.

Arrivout 'ra eta an Tad mad Forestier  
Hac he vreur Coniat a so en he guever:  
Devet int gant an tan a garante Doue,  
Vit procuri he c'hloar ha salvi hon ine.

Guir vignouñed Jesus a goumanç pesqueta;  
Dont a ra d'ho sicour ar Veleyen nessa:  
Bars ar sizun guenta a so var dro ugent,  
Hac en eil a n'hem gav ive tost da guemend.

Comz ar brezeguerien a vesq mor bras ar bed;  
Guelet 'rer ho rouëjou deus a bêt tu carguet;  
Ar barosianed a hast e n'hem renta;  
An diavezourien a deu d'ho imita.

Nep ho chelaou er-fad so red deze compren  
Vit petra eo lacquet var an douar an den;  
Petra dle da ober, petra da dilésel,  
Mar fell deza cavet lod er joa eternal.

Querquent ha peder heur a son an *Angelus*,  
Vit dont da saludi ar Verç'hes gloriüs;  
Hac, adalec pemp heur, d'ho zro, ar Veleyen  
A dalc'h da celebri myster an oféren.

Maes quentoc'h, a-liès, so rencquet digueri  
An templ santel d'ar bopl, vit antren da bidi:  
A veichou da div heur, bete da hanter nos,  
Hep distera disurz, mui vit er barados.

Da seiz a ve ive oféren brincipal  
Ha, dious-tu, a creguer er pedennou rac-dal:

N'hem unani a ra neuse an oll mouëziou  
Da gana canticou hac ar goure'hemmenou.

A bep costez a so près ha devoccion;  
Leun a ve an ilis; bras an attancion;  
Da seiz heur deus an nos ve c'hoas *penitanted*  
Er c'hovezionnou o disclery ho fec'hed.

Ar Vissionnerien, pep a diou veich bemde,  
A deu da explicqua scler-mad ar vuirione;  
Gant nerz ar Speret-Glan, hep mar, int inspiret :  
Ar c'halounou yena en instant so tommet.

Eun hanter leo vian deus a vourg Pluzunet  
A so eur chapel vrao da Vari dediet :  
Gant fe, an eilvet Sul demeus ar missionn,  
Ve querc'het he imaich bars an prozecion.

Er c'hœur a so savet eun tron caër hac huel  
Dirag an auter vras evit ar Vamm santel :  
Ac'hane a n'hem blich o recev hon hommaich  
Hac ho distribui an nerzussa couraich.

Piou benac a neveys epad eiz de heuliet  
An oll exercissou a so bet absolvet;  
Dont a ra d'ar Sadorn c'hoas da gommunia :  
D'ar Sul vit an anaoun e ra ar memes tra.

D'ar Sadorn ve, ouspenn, biniguet ar c'hroajou,  
An habichou bian hac ar chapeledou;  
Neuse a so da choas deus a beder breuriez :  
Ar bautred a ell mont en-he oll assablès.

Nicun na oa da ze, evit guir, obliget;  
Maes gant contantamand eo bet an dud guelet  
O diredec a leiz evit n'hem arrolli :  
Couls ez eo lavaret n'en deus manquet hini.

Ar Sul eiz a C'huevrer mil eiz cant tri ugent  
Ha tri, a-boë m'eo deut ar C'hris, patromm ar Sent,  
So bet fin d'an termen favorapl accordet  
Vit obteni pardoun deus ar brassa pec'hed.

Douguen a rer d'al Loc Rouanès an Envou;  
Clevet a ve var dro trous al letaniou  
A ganer dre an hend evit he enori,  
Rac er c'huëroan anquen a deu d'hon c'honsoli.

Maes brema eo red chomm eun nebeud, Mamm dener,  
Da adori hon Mestr, hon Salver, ho Map quer.  
An Autrou Forestier a vinig ar C'halvar  
Var bini eo digor diou vrec'h Roue ar gloar.

Penos rei da gompren peguen touchant sarmonn  
A ra an Tad Coniat var groas ar missiönn?  
An oll azystanted a deu da hirvoudi  
Ha da voëla dourecq o clevet anezi!

Quen a vezo, Sin sacr deus hon Silvidiguez!  
Poënt eo demp cass d'ar guer hon guir avocadès.  
Supliomp anezi da divoall hon ine  
Ous ar peichou stignet a beurz an droug Elez.

Distroomp var hon guiz hep paouez da gana :  
« *Salud, Stereden Vor! Ave, Maris Stella!* »  
Er Venediccion vo goude azistet  
Ha, dre an *Te Deum*, graç da Doue rentet!

Arri eo ar moumend demeus an disparti.  
Souden bars an ilis vo difroncq, goël ha crit....  
An Tad bras a guiniad deus an deved fidel,  
Hac an Autrou Person deus an Tadou santel!

Mar so etal ar groas bet squilhet forz daëlou,  
Ama eo bruzunet, certen, ar c'halounou,  
A bere birviquen na vezo effacet  
Mouëz an Tad Forestier nac an Autrou Bouget!

Miromp ar c'hentelliou a deveus demp roet;  
Requedtemp, vit ho foan, ma vo recompanset  
Hy ha quemend belecq a so deut d'ho sicour  
Da drailha liammou Satan, hon adversour.

Trugare, enor dec'h, Pastoret Pluzunet!  
Paour, pinvic, beo na marv na so bet ancouet!  
Me garre a chomfemp brema var an hend mad,  
Vit scleria en tu déou en traouyen Josaphat!